

GEREJA KRISTEN PROTESTAN INDONESIA (GKPI)

Jemaat Dame Dr. IL. Nommensen

Resort Sait Nihuta

TATA IBADAH MINGGU PENTAKOSTA I

(Minggu, 23 Mei 2021)

1. Marende BE. 461: 1-3 “Songgop tu hami”

2. Votum / Introitus

U : Di bagasan goar ni Debata Ama dohot Anak-Na Tuhan Jesus Kristus, dohot Tondi Parbadia.

R : Amen

U : Songon on ninna Tuhan Jahowa: Jala Lehonon-Ku tu hamu roha na imbaru dohot tondi na imbaru tu bagasan ateatemuna: jala unsatongKu do roha batu sian dagingmuna, jala lehonon-Ku tu hamu roha sibuk. Jala lehonon-Ku tondingku tu bagasan ateatemuna, jala Ahu mambahensa, asa marparange hamu di bagasan angka Patik-Ku, angka uhum-Hu pe radotan jala patupaonmuna do. Haleluya !

R : Mangendehon: “Haleluya, Haleluya, Haleluya”

U : Martangiang ma hita ... Ale Tuhan Debata, Amanami ! Ho do manondangi jala mangajari roha ni angka na porsea di HataM marhitehite Tondi Parbadia. Sai buhai ma rohanami, asa ture parrohaonnami marhitehite Tuhan Jesus Kristus, Tuhannami. Amen

3. Marende BE. 102:1+3 “ O Tondi Parbadia i, Bongoti”

4. Epistel: HESEKIEL 37:11-14

5. Marende BE. 186: 1-2 “ Tongtong tutu na dengarkan do”

6. Tangiang Manopoti Dosa

U : Tapahohom ma dirinta laho manolsoli dosanta di adopan ini Debata. Martangiang na hohom ma hita marsadasada ...

Ale Amanami na di banua ginjang na sun badia ! Nandang tama hami ro tu adopan-Mu, ai nag ok dosa do hami, pikiran nang rohanami sai manambil do sian hasintongan-Mi. Alai hinorhon ni asi ni roha ni Anak-Mu Jesus Kristus Tuhannami, umbahen tarbahen hami ro tu adopan-Mu mangido hasesaan ni dosa dohot pangalaosionnami. Urupi jala asi ma roham di hami, sesa ma sude na jat sian hami jala jangkon ma hami gabe anakkon-Mu. Ale Tondi Parbadia, sondangi ma tondi nang pingkirannami asa tarbahen hami mangulahon na hombar tu lomo ni

rohaM jala gabe anak-Mu na burju hami manghatindanghon Jesus Kristus Tuhan jala sipalua portibion. Amen
Laos tabege ma bagabaga ni Debata taringot tu hasesaan ini dosanta “Molo tatopotni angka dosanta, haposan do lbana jala bonar, manesa dosanta jala paiashon hita sian nasa hageduhon” Hasangapon ma di Debata na di Ginjang!

R : Amen

7. Marende BE. 417: 1

8. Togutogu tu ngolu na imbaru: Ulaon Apostel 1:8

(Dung dijaha togutogu tu ngolu na imbaru i, marudut ma muse manjaha na ditoru on)

U : Antong rap ma hita martangiang, mangido gogo tu Debata laho mangulahon na hombar tu hataNa i.

R : Ale Tuhan Debata, pargogoi ma hami mangulahon na hombar tu hataml. Amen

9. Marende BE. BE. 107: 1-2 “ O Tondi Parbadia, sai masuk”

10. Manghatindanghon Haporseaon

11. Tingting / Tangiang Pangondianon

12. Marende BE. 229: 1-3 “ Hatami, ale Tuhanku”

13. Jamita: JOHANNES 16:4b-15

14. Marende BE. BE. 470: 1-2 “ Panotnotni ma silang”

15. Ayat Pelean: MATIUS 8:4

16. Tangiang Pelean

U : Ale Amanami na di banua ginjang. Diparhatopot rohanami do sian unduk ni rohanami, Ho do mual ini nasa ulibasa na maulitus. Dison hupasahat hami do pelean hamauliateonnami tu Ho. Sai jalo jala pasupasus peleannami on asa gabe dalam panindangion, parsoran, dohot asi ni roha di Huria Mon. Bahen ma ngolunami gabe pelean na hombar tu lomo ini rohaM, jala prasidohot parohon HarajaonMu, holong, dohot hadameonMu di sandok portibi on. Buhai ma rohanami marhitehite TondiM, asa sai tongtong mandok mauliate tu Ho, dibagasan goar ni AnakMu, Jesus Kristus, Tuhannami. Amen.

16. Ende Pelean BE. BE. 299:6, “Debata do Manggomgomi”

17. Tangiang Ale Amani

(Molo ndang adong partohonon na manguluhon parmingguon, rap mandok ma sude ruas di tangiang “Ale Amanami”. Alai molo partohonan do manguluhon, hombar ma tu hasomalan parmingguon di gareja)

18. Doksologi: “Ai Ho do nampuna harajaon ...”

(sude ruas mangendehon molo na manguluhon parmingguon angka partohonan)

19. Amen – Amen – Amen

Jamita:

PENTAKOSTA: HABOBONGOT INI TONDI PANGONDIANON

Sadari on nunga bongot hita tu minggu na ginoaran, **Pentakosta**. Pentakosta ima 50 ari dung haheheon; manang 10 ari dung hananaek. Dung Pentakosta sadari on, mamungka ma sian minggu na naeng ro on, sahat tu ujung taon parhuriaon di ujung ni bulan November, masuk ma hita tu minggu Trinitatis. Di bahasa Batak, minggu Trinitatis didok do minggu hasitolusadaon. Antong, aha do astuan ni minggu Pentakosta di hita sadari on?

Ojahan ni parningotan ari Pentakosta tarsurat do Ulaon Apostel 2:1-13. Tarsurat ma disi parpunguan ini halak Israel di Jerusalem, na ro sian angka luat parserahan nasida. Dohot do angka sisean ni Jesus di parpunguan i. Hatiha i, dung songgop Tondi Parbadia tu nasida, marjamita ma angka sisean i mamangke hata hombar tu hasomalan ni halak Israel di luat parserahan nasida. Longang do na torop i marnidasa. Longang ni roha ni angka na torop i tarida ma di Ulaon Apostel 2:8, “Boasa ganup hita umbege di hata hasomalanta be?” Jadi, impola hasasaor ni Tondi Parbadia tarida do i sian hagiote laho mamaritahon Barita na Uli di portibi on. Lapatanna, ulaon mamaritahon Barita na Uli, dang ulaon ni jolma i, alai ulaon ni Debata dibagasan Tondi Parbadia. Songon dia do rumang di Barita na Uli i? Ima na naeng sipagasonta di minggu sadari on marhitehite turpuk na saor tu hita.

Molo tapamanat turpuk sadari on, boi ma dohonon adong do tolu Barita na Uli i: Parjolo, barita taringot tu dosa (ayat 9); Paduahon, barita taringot tu hapintoron (ayat 10); Patuluhon, barita taringot tu uhum (ayat 11). Pinatorang ma jolo on marsadasada.

Barita taringot tu dosa ima na Jesus do na mangalehon hasesaan ni dosa tu hita. Alani holongNa do umbahen na tolhas tu hita hasesaan ni dosa i. Nang pe godang halak na so porsea tu holong ni Jesus, alai parbue ni Tondi Parbadia naung bongot tu hita, ringkot situtu ma pataridahonon holong ni Jesus di portibi on marhitehite hata dohot ulaonta.

Barita taringot tu hapintoron, ima na Jesus do sipalua. Ringkot do molo tapahombar ayat 10 i dohot Ulaon Apostel 5:31, “Tu siamunNa do dipabangkit

Debata Ibana gabe Partogi jala Sipalua, laho mangalehon tu halak Israel hamubaon ni roha dohot hasesaan ni dosa” Lapatanna, parbue ni Tondi Parbadia di portibi on ima haporseaon na polin na Jesus do Sipalua. Alani, mansai ringkot ma boi tapatarida i di bagasan panghataion dohot parulaon. Barita taringot tu uhum, ima taringot tu partinaonan ni Jesus. Dison do ihotihot ni dua hatorangan na di ginjang i. Ala naung ditaon Jesus do hamatean umbahen na tolhas tu hita hasesaan ini dosa. Jala alani hamateanNa do umbahen na gabe sipalua Ibana di bagasan ngolunta. Alani, roha holong ni Jesus ringkot situtu tarida di portibi on marhitehite pandohan dohot parulaonta, ima marpanarohon tu ngolu ni dongan jolma. Marroha pangoluhon, ima astuanna.

Sian angka hatorangan na di ginjang i, sahat ma hita nuaeng tu siputihon na gabe bohal ni haporseaonta. Molo tabege barita di na humaliang, nunga mansai rarit sahit Covid-19. Boi do hita gabe lomos, mabiar, jala mandele hira na so adong be ujung ini sahit on (on ma na nidokna *apatitis*). Panghorhonna, na olo do gabe panihus tu dongan na asing; jala na gabe olo do hita muse dang marpanarohon bet u dongan. Alai, olo do ra gabe tubu di hita pingkiran na so porsea be di angka barita. Alani gabe lupa ma hita mangulahon *Protokol Kesehatan* (on ma na nidokna *skeptis*), huhut dang porsea be hita di angka barita taringot tu sahit i. Sai unang adong pingkiran na songon i tubu di hita.

Alani, boi do bahenonta turpuh on gabe bohal partondion mangadopi na masa nuaeng. Di na masa na taadopi nuaeng, holong ni Jesus do sipangasahonon dohot siulaon. Songon dia ma rumangna? Marroha pangoluhon, ido dalan siboluson di tingki on. Godang do nuaeng donganta na hona sahit Covid-19 i naung mabiar jala lomos. Dang holan alani jorbut ni sahit i. Alai olo do na mabiar jala lomos nasida marnida halak na humaliang; panghilalaanna hira naung dipabali do nasida sian parsoraan siganup ari. Molo dibolus halak sisongon i, boi do nasida mandele jala mandate.

Sabalikna, Tondi ini Debata ima pangondianon. Tondi i ma tapangasahon anggiat boi hita mangalehon roha na pangoluhon dohot panghirimon tu angka dongan na hona sahit i. Dang tihus nasida. Alai tapatarida panghophop ni Debata maradophon nasida marhitehite rumang ni parsoraonta dohot nasida. Tatungkoltungkoli ma haporseaon nasida tu Debata, na Ibana do marhitehite Jesus Kristus, di bagasan Tondi Parbadia, na manghophop jala sipalua, mambahen nasida sogot malua sian gomgomon ni sahit i. Sahali na i, tajanghon ma Tondi Parbadia i laho pahothon haporseaonta huhut

mangalehon roha na panguluhon tu angka dongan na hona sahite Covid-19 dohot dongan na humaliang. Amen

GEREJA KRISTEN PROTESTAN INDONESIA (GKPI)
Jemaat Dame Dr. IL. Nommensen
Resort Sait Nihuta
TATA IBADAH MINGGU PENTAKOSTA II
(Senin, 24 Mei 2021)

1. Marende BE. 14: 1-3 “ Puji hamu jahowa tutu”

2. Votum / Introitus

U : Di bagasan goar ni Debata Ama dohot Anak-Na Tuhan Jesus Kristus, dohot Tondi Parbadia.

R : Amen

U : Songon on ninna Tuhan Jahowa: Jala Lehonon-Ku tu hamu roha na imbaru dohot tondi na imbaru tu bagasan ateatemuna: jala unsatongku do roha batu sian dagingmuna, jala lehonon-Ku tu hamu roha sibuk. Jala lehonon-Ku tondingku tu bagasan ateatemuna, jala Ahu mambahensa, asa marparange hamu di bagasan angka Patik-Ku, angka uhum-Hu pe radotan jala patupaonmuna do. Haleluya !

R : Mangendehon: “Haleluya, Haleluya, Haleluya”

U : Martangiang ma hita ... Ale Tuhan Debata, Amanami ! Ho do manondangi jala mangajari roha ni angka na porsea di HataM marhitehite Tondi Parbadia. Sai buhai ma rohanami, asa ture parrohaonami marhitehite Tuhan Jesus Kristus, Tuhannami. Amen

3. Marende BE. 461: 1-2 “ Songgop tu hami”

4. Epistel: JOEL 3:1-2

5. Marende BE. 106: 1-2 “ Ale Tuhan, Amanami”

6. Tangiang Manopoti Dosa

U : Tapahohom ma dirinta laho manolsoli dosanta di adopan ini Debata. Martangiang na hohom ma hita marsadasada ...

Ale Amanami na di banua ginjang na sun badia ! Ndang tama hami ro tu adopan-Mu, ai na gok dosa do hami, pikiran nang rohanami sai manimbil do sian hasintongan-Mi. Alai hinorhon ni asi ni roha ni Anak-Mu Jesus Kristus Tuhannami, umbahen tarbahen hami ro tu adopan-Mu mangido hasesaan ni dosa dohot pangalaosionnami. Urupi jala asi

ma roham di hami, sesa ma sude na jat sian hami jala jangkon ma hami gabe anakkon-Mu. Ale Tondi Parbadia, sondangi ma tondi nang pingkirannami asa tarbahren hami mangulahon na hombar tu lomo ni rohaM jala gabe anak-Mu na burju hami manghatindanghon Jesus Kristus Tuhan jala sipalua portibion. Amen

Laos tabege ma bagabaga ni Debata taringot tu hasesaan ini dosanta ... “Dung i sao ro ma hamu, asa mardanudabu hita, ninna Jahowa. Tung sura rara dosamuna songon abit bunga dapdap, botar do bahenonku songon itak; nang pe rara songon abit hasumba, gabe songon hapas do muse.” Hasangapon ma di Debata na di Ginjang!

R : Amen

7. Marende BE. 487: 1-2 “Tung halak na margogo”

8. Togutogu tu ngolu na imbaru: Ulaon Apostel 2:17-18

(Dung dijaha togutogu tu ngolu na imbaru i, marudut ma muse manjaha na ditoru on)

U : Antong rap ma hita martangiang, mangido gogo tu Debata laho mangulahon na hombar tu hataNa i.

R : Ale Tuhan Debata, pargogoi ma hami mangulahon na hombar tu hataml. Amen

9. Marende BE. 107: 2 “ O tondi Parbadia i, sai masuk”

10. Manghatindanghon Haporseaon

11. Tingting / Tangiang Pangondianon

12. Marende BE. 463: 1-3 “ PasupasuM tongosonMu”

13. Jamita: ROM. 8:1-8

14. Marende BE. BE. 464: -2 “Huboan ma diringku”

15. Ayat Pelean: MATIUS 8:4

16. Tangiang Pelean

U : Ale Amanami na di banua ginjang. Diparhatopot rohanami do sian unduk ni rohanami, Ho do mual ini nasa ulibasa na maulitus. Dison hupasahat hami do pelean hamauliateonnami tu Ho. Sai jalo jala pasupasu peleannami on asa gabe dalam panindangion, parsaoan, dohot asi ni roha di Huria Mon. Bahen ma ngolunami gabe pelean na hombar tu lomo ini rohaM, jala prasidohot parohon HarajaonMu, holong, dohot hadameonMu di sandok portibi on. Buhai ma rohanami marhitehite TondiM, asa sai tongtong mandok mauliate tu Ho, dibagasan goar ni AnakMu, Jesus Kristus, Tuhannami. Amen.

17. Ende Pelean BE. 299:6 “Debata do Manggomgomi”

18. Tangiang Ale Amani

(Molo ndang adong partohonon na manguluhon parmingguon, rap mandok ma sude ruas di tangiang "Ale Amanami". Alai molo partohonan do manguluhon, hombar ma tu hasomalan parmingguon di gereja)

19. Doksologi: "Ai Ho do nampuna harajaon ..."

(sude ruas mangendehon molo na manguluhon parmingguon angka partohonan)

20. Amen – Amen – Amen

Jamita:

PARROHA TONDI MA, UNANG PARROHA DAGING

Sadari on, marningot ma hita di Pesta Pentakosta II. Nantoari uju di Pesta Pentakosta I, nunga tapabagas songon dia do ngolu ni halak naung manjanghon Tondi Parbadia, lumobi ma marnida angka na masa nuaeng. Sadari on, di Pesta Pentakosta II ditambahi ma muse tu hita rumang ni parngoluon na dibagasan tondi.

Ojahan ni turpuk sadari on ima surat na ginurithon ni Apostel Paulus, manopot huria na di luat Rom. Diondolhon apostel i do di turpuk sadari on, adong do dua parngoluon ni sadah alak. Parjolo, halak na marguru tu pardagingon; Paduahon, halak na marguru tu Tondi. Songon dia ma hatorangan ni? Tangkas ma i dipatorang di ayat 5, "Ai pardagingon do diparrohahon angka na mangihuthon daging i; alai Tondi do diparrohahon angka na mangihuthon Tondi i"

Songon dia ma parngoluon ni halak na marguru tu pardagingon? Ayat 6-7 tangkas do i dipatorang, ima: Parjolo, halak na marguru tu pardagingon ima hamatean (ayat 6). Dang holan hamatean ni pardagingon astuanna, alai mangerbang tu hamatean ni partondion. Halak na marguru tu pardagingon ima halak na lemba manambornambori haporseaonna, jala sai dibahen do sidalian laho pasiding diri sian Debata. On ma halak na marguru tu pardagingon.

Paduahon, halak na marguru tu pardagingon ima na marhamusuon dompak Debata (ayat 7). Songon dia do rumang jolma na songon on? Jakobus 4:4 mandok, "... asa na naeng aleale ini portibi on dipajongjong do dirina gabe alo ni Debata" Na maraleale dohot portibi on ima halak na olo pasolhot diri tu portibi on dohot angka na pinarhagiotna.

Sabalikna, songon dia ma parngoluon ni halak na marguru tu partondion? Di ayat 6-7 tong do i dipatorang. Di ayat 6 i didok ma, ia halak na

marguru tu tondi ima halak na giot mangalehon hangoluan. Na nidokna taringot tu hangoluan ima asa hisar pematang jala hisar panaili ni ganup jolma. Lapatanna, hadirionta ingkon boi manubuhon pangkirimon tu angka na humaliang, dang gabe mual ni pandelean.

Dung i didok ma muse di ayat 7 i, ia halak na marguru tu Tondi ima na olo unduk di patik ni Debata. Ido bonsirna molo pinatorang nangkaningan, halak na marguru tu portibi ima na olo mangoloi hagiort ni portibi on. Ai maralo pinarhagiort ni portibi dohot patik ni Debata. Alani, molo sada halak na olo diuluhon Tondi i, margogo doi bana mangulahon patik i dibagasan ngoluna siganup ari.

Antong beha ma parpeak ni turpuk on di ngolunta? Tong do bahenon turpuk sadari on manondangi na taadopi do pe nuaeng. Di hamaolon na rap taadopi nuaeng, jotjot do lilu manang gale partondion ni angka jolma. Molo sian pingkiran hajolmaon, boi do dapot roha i. Alai turpuk on ma na gabe bohal di hita; manang boi do tong turpuk on gabe joujou ni partondionta. Digora do hita asa mangolu dibagasan Tondi.

Songon dia ma halak na mangolu dibagasan Tondi laho mangadopi na masa nuaeng? Na ringkot siulahononta ima, gabe halak na parohon hangoluan ma hita tu ganup na humaliang, lumobi ma tu halak na tongon nuaeng manaon Covid-19 i. Mansai lomos do roha nasida; jala olo do sipata mabiar manang maila nasida marnida angka na torop. Olo do gabe bangkol rohanasida marsaor dohot dongan jolma. Mabiar, atik na ditihasi jolma do nasida. Molo sai songon i do tongtong panghilalaannasida, olo do gabe pendelean na tubu.

Disi ma mansai ringkot tahangoluhon dohot taparaidahon ulaon ni Tondi Parbadia marhitehite hita. Unang gabe panihasi hita; unang gabe girgir hita pabali jolma. Alai, ingkon boi do hita parohon panghirimon tu nasida. Nunga gale pingkirannasida nuaeng alani sahit i, alai talehon ma dirinta asa unang margale pingkirannasida. Talehon ma dirinta asa gabe tubu panghirimon di nasida. Talehon ma dirinta asa hisar pematangnasida jala sihar panailinasida marnida hangaluton na masa nuaeng.

Ima ngolu ni halak na di bagasan Tondi Parbadia. Jala taingot ma pandohan ini turpuk on di ayat 8, "Alai ndang tarhalomohon Debata angka parroha daging". Lapatann, lomo ni roha ni Debata ima ngolu na olo diuluhon Tondi Parbadia; ngolu na olo manubuhon panghirimon tu ganup halak na humaliang. Amen